

LEGENDE DOGOVARAJU KONCERT U SKENDERIJI

Poslije nekoliko manjih nastupa u Sarajevu, sazrela je prilika da se u ovom gradu, gdje je muzika veoma cijenjena, predstavimo na najbolji način, kaže Zoran Dašić



Legenda sa "Legendama": Halid Bešlić sa "Legendama" na snimanju spota

Iako su čitav juli bili na odmoru, neko u Turskoj, neko u Grčkoj, najpopularnija pop-folk grupa u Srbiji "Legende" kraj ljetnje sezone provešće svirajući i nastupajući po Crnogorskom primorju.

- Ja sam bio sa ženom u Grčkoj. I dok sam lješkario na pjesku i sunčao se, iz Srbije su mi stizale prijatne vijesti. Naša pjesma "Tamburaši, tiho svirajte" koju smo snimili sa Halidom Bešlićem, još uvijek je veliki hit.

Kako čujem, ova pjesma je nominovana i za godišnju nagradu "Zlatni melos", koja će se dodijeliti u Petrovcu na Mlavi, 2. novembra. Ako Bog da, pjesmu ćemo otpjevati sa Halidom, ukoliko tog dana bude slobodan da doputuje u Srbiju.

Iskreno da kažem, pjesma za koju smo snimili spot u etno selu "Stanišići" kraj Bijeljine je bila pun pogodak - kaže Zoran Dašić Daša, vođa grupe, inače, muzički urednik u Radio televiziji Srbije.

Grupa „Legende“, je po Zoranovoj evidenciji, koju vodi precizno, nastupila sedam puta u Sarajevu!

- Uglavnom su to bili mali prostori. Sada planiramo da održimo jedan veliki koncert, najvjerojatnije u "Skenderiji". Imamo više razloga da to učinimo, a najvažniji je što smo u Bosni svakog dana sve traženiji. Naravno, na koncertu će Halid biti naš glavni gost.

Pošto je sada naš menadžer Gane Pecikoza, inače Sarajlija, on najbolje zna gdje bi trebalo da održimo koncert. Jer poslije nekoliko manjih nastupa u Sarajevu, sazrela je prilika da se u ovom gradu, gdje je muzika veoma cijenjena, predstavimo na najbolji način.

Zoranu je drago što njegova grupa i dalje nije "miljenica" novinara "žute štampe".

- Do sada smo bili pošteđeni od tabloida jer za njih nismo bili nikad interesantni. To mi je drago. Svi članovi grupe "Legende" vode miran i porodičan život. Zato nas i nema u "žutoj štampi". Mi svoju popularnost gradimo dobrim i kvalitetnim pjesmama. Dok drugi žive i opstaju zbog tračeva, mi živimo i opstajemo zbog dobre svirke i kvalitetnih pjesama - kaže Zoran Dašić Daša, koji sa nestrpljenjem očekuje veliki koncert u Sarajevu.